

Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ
ՀԱՅԿԱԿԱՆ ԳՐԱԴԱՐԱՆՆԵՐԻ ՄԻԶԱԶԳԱՅԻՆ ԵՐՐՈՐԴ ՀԱՄԱԺՈՂՈՎԻՆ
(Մայր Աթոռ Ս. Էջմիածին, 6 հոկտեմբերի, 2014 թ.)

«Ո՛չ հացի միայն կեցցե մարդ, այլ ամենայն բանիւ, որ
ելանէ ի բերանոյ Աստուծոյ» (Մտթ. Դ 4):

Գերաշնորհ Սրբազան Հայրեր,
Հոգեշնորհ և Արժանապատիվ Հայրեր,
Համաժողովի հարգարժան մասնակիցներ.

Մայր Աթոռ Սուրբ Էջմիածնում ողջունում և Հայրապետական Մեր
օրհնությունն ենք բերում ձեզ՝ Հայկական գրադարանների միջազգային երրորդ
համաժողովի մասնակիցներին:

Ուրախ ենք, որ 2009 թվականին Մայր Աթոռ Սուրբ Էջմիածնի հովանու
ներքո ԱՄՆ Հայոց Արևելյան թեմի նախաձեռնությամբ գումարված համաժողովն
ունեցավ շարունակություն, և այսօր դուք կրկին համախմբվել եք՝ ի խնդիր
հայկական գրադարանների գործունեության արդիականացման ու լիարժեք
կազմակերպման և արդյունավորման:

Գիրքը մարդկային մշակույթի հնագույն ձեռքբերումներից է, քանզի «ո՛չ
հացի միայն կեցցե մարդ, այլ ամենայն բանիւ, որ ելանէ ի բերանոյ Աստուծոյ»:
Գրավոր մշակույթ մեր ժողովուրդն ունեցել է վաղնջական ժամանակներից:
Աստվածատուր շնորհով ունեցանք նաև Մեսրոպյան սքանչելագործ մեր գիրը,
որը Աստծո հրեղեն խոսքով սրբեց, լուսավորեց և իմաստացրեց մեր ժողովրդի
հոգին: Մեր իրականության մեջ, ինչպես հոգևոր առատաբուխ ակունքից, սկիզբ
առան հայախոս գրքերը, ստեղծվեցին բազում վանական գրադարաններ, որոնք
հակառակ դարերի փորձությունների՝ պահպանեցին մեր գրավոր
ժառանգությունը և նրա առաքելությունը մեր ժողովրդի կյանքում: Կրթա-
լուսավորչական նշանակությունից բացի մեր գրավոր մշակույթը՝ որպես հոգևոր
հզոր ուժ, պահպանել է նաև հայ կյանքի սահմանները: Արդարև, սուրբ գրական
խոսքի համաձայն՝ ոչ միայն հացով կյանք ունեցավ մեր ժողովուրդը, այլև՝ իր
հոգևոր արժեքներով՝ գրավոր բարձր մշակույթով ու հարուստ ժառանգությամբ:
Նրանցում մեր հայրենիքն է, մեր սրբություններն են, խաղաղ կյանքի մեր
ձգտումները և մեր անսասան հավատքը Աստծո կենարար խոսքի հանդեպ, որը
պիտի շարունակի ապրեցնել մեր ժողովրդին ու պահպանել աստվածախնամ
ճանապարհներում:

Առաջին հայերեն գրավոր կոթողների պահոց եղավ Սուրբ Էջմիածնի
Մատենադարանը, որն այսօր այս գեղեցիկ և արդիական հարկի ներքո

համախմբել է ձեզ՝ մեր գրավոր մշակույթի պահպանման, ներկայացման, ուսումնասիրման անխոնջ նվիրյալներիդ: Մենք վստահ ենք, որ գրադարանային գործի մշակներիդ, հայ գրքի հետազոտողներիդ պարբերաբար Մայր Հայրենիքում մեկտեղումը լավագույնս պիտի օգնի մեր գրավոր ժառանգության արժևորմանը և նրա՝ հոգեխնամ ու ազգապահպան առաքելության զորացմանը: Մեր հոգևոր կենտրոնի, հայրենի և օտար այլ քաղաքների գրադարաններից, մատենադարաններից ու գրապահոցներից այսօր նոր շնչով պետք է շարունակվի մեր գրավոր ժառանգության առաքելությունը:

Աղոթքով առ Աստված վերստին բերում ենք Ձեզ Հայրապետական Մեր օրհնությունը և գնահատանքը՝ մեր ժողովրդին Ձեր մատուցած ազնիվ ծառայության, անձանձիր նվիրումի և նախանձախնդրության համար և հաջողություն մաղթում համաժողովի աշխատանքներին:

Հայրապետական մեր գնահատանքն ենք բերում ՀՀ մշակույթի նախարարությանը՝ համագումարի կայացմանը բերած ջանքերի և աջակցության համար:

Հայրապետական օրհնությամբ Մեր գնահատանքն ենք բերում Մայր Աթոռ Սուրբ Էջմիածնի «Վաչե և Թամար Մանուկյան» Մատենադարանի և ՀՀ Ազգային գրադարանի տնօրինություններին՝ համաժողովի կազմակերպչական աշխատանքները բոլորանվեր հանձնառությամբ և մեծ նախանձախնդրությամբ իրականացնելու համար:

Աղոթում ենք, որ Բարձրալյն Աստված Իր Զորավոր Աջի ներքո պահի մեր ժողովրդին ի սփյուռս աշխարհի և առատ դարձնի հոգևոր լույսի արգասիքները մեր կյանքում:

Շնորհ և խաղաղությւն Տեառն մերոյ Յիսուսի Քրիստոսի եղիցին ընդ ձեզ և ընդ ամենեսեան. ամեն:

ԳԱՐԵԳԻՆ Բ
ԿԱԹՈՂԻԿՈՍ ԱՄԵՆԱՅՆ ՀԱՅՈՑ